

類編增廣黃先生大全文集

七

類編增廣黃先生大全文集卷第十七

酬荅下

荅閻求仁

暮天攜手步河梁把酒淹留斜日光生當有別各異方古人嗟此樂難常
大梁嬉遊少年場春風花枝轉顰黃節物謝徂歲渠央來自江南登君堂
秋氣欲動聞寒蟬會幾何日今別長與子觀化言兩忘浩歌放船入漆蒼
綠藻刺眼紅蕖香湖月夜飛衣袂涼相從夜坐歌胡牀贈言錦繡邀報章
君心溫良志則剛不能牛下學歌商欲謝世紛自翱翔果行此策無乃良
昔人所學浩渺茫海函地負無抵當充指及人其糶糠帝王之功一毫芒
既超世故自遐遑何異臧穀俱亡羊以生隨之中道傷止吾已知終必亡
我亦聞之未能行慨今無策可伏藏身隨衣食葉南陽脫身自當及康強
不待齒疎髮蒼浪優游濠上如惠莊論文莫逆與子相

次韻郭明叔長歌

君不見縣車劉屯田騎牛澗壑弄潺湲八十唇紅眼點漆金鍾舉酒不留
殘君不見征西徐尚書為國捐軀矢石間龍章鳳姿委秋草天馬長辭十
二關何如高陽酈生醉落魄長揖輟洗驚龍顏丈夫當年傾意氣安用蚬
食而蝸蚶古人已作泉下土風義可想猶班班郭侯忠信如古人薦書飛
名上九關詩書自可老斲輪智略足以解連環銅章屈宰山水縣友聲相
求不我頑鵬翼垂天公直起燕巢見社身思還文思舜禹開言路即看承
詔著芻冠尚趨手板事直指少忍吏道之多艱黃花零落一尊酒別有天
地非人寰

荅王晦之見寄

縣樓三十六峯寒王粲登臨獨倚欄清坐一番春雨歇相思千里夕陽殘
詩來嗟我不同醉別後喜君能自寬舉目盡妨人作樂幾時歸得釣鯢相

次韻晁補之廖正一贈荅

晁子抱材耕谷口世有高賢踐台斗頃隨計吏西入關關夫數日傳車還
封侯半屬妄校尉射虎猛將猶行間無因自致青雲上浪說諸公見嗟賞
驥伏監車不稱情輕裘肥馬鳳凰城歸來作詩謝同列句與桃李爭春榮
十年山林廖居士今隨詔書稱舉子文章宏麗學西京新有詩聲似侯喜
君不見古來良為知音難絕絃不為時人彈已喜瓊枝在我側更恨桂樹



無由攀千里風期初不隔獨憐形迹滯河山

再次韻呈廖明略

吾觀三江五湖口湯湯誰能議升斗物誠有之士則然晚得廖子喜往還
學如雲夢吞八九文如壯士開黃閭十年呻吟江湖上青楓白鷗付心賞
未減北郭漢先生五府交書不到城相者舉肥驥空老山中無人桂自榮
君既不能如鍾世美甄函上書動天子且向華陰郡下作參軍要令公怒
令公喜君不見晁家樂府可管絃惜無傾城爲一彈從軍補祿百僚底九
關虎豹何由攀男兒身健事未定且莫著書藏名山

走答明略

君不見生不願爲牛後寧爲雞口吾聞向來得道人終古不忒如維斗希
價咸陽諸少年可推令往挽令還俗學風波能自拔我識廖侯眉宇間省
庭無人與爭長主司得之如受賞東家一笑市盡傾略無下蔡與陽城生
珠之水砂礫潤生玉之山草木榮觀君詞章亦如此諒知躬行有君子更
約探囊閱舊文蛛絲燈花助我喜賢樂堂前竹影斑好鳥自語莫令彈北
鄰著作相勞苦整駕謁子邀同攀應煩下榻煮茶藥坐待月輪銜屋山

答明略并寄無咎

可以忘憂唯有酒清聖濁賢皆可口前日過君飲不多明日解醒無五斗
古木清陰丹井欄夜來涼月屋頭還論交撥置形骸外得意相忘樽俎間
冰壺不可與夏虫饗秋月不可與俗士賞已得樽前兩友生更思一士濟
陽城雖無四至九卿之規畫猶有千秋萬歲之真榮空名未食太倉米今
作斑衣老萊子卿家嗣宗望爾來不獨我聞足音喜西風索寞葉初乾長
鉞歸來亦罷彈窮巷蓬蒿深一尺朱門廉陛高難攀吾儕相逢置是事百
世之下仰高山

再次韻呈明略并寄無咎

夏雲涼生土囊口周鼎湯盤見料斗清風古氣滿眼前乃是戶曹報章還
只今書生無此語已在貞元元和間一夫鄂鄂獨無望子夫唯皆論賞野
人泣血漫相明和氏之璧無連城參軍拄笏看雲氣此中安知枯與榮我
夢浮天波萬里扁舟去作鷓鴣子兩士風流對酒樽四無人聲鳥聲喜夢
回擾擾仍世間心如傷弓怯虛彈不堪市井逐乾沒且願朋舊相追攀寄
聲小掾篤行李落日東面空雲山

再答明略二首

挾策讀書計糊口故人南箕與北斗江南江北萬重山千里寄書聲不還
當時朱絃寫心曲果在高山深水間枯桐滿腹生蛛網忍向時人覓清賞
廖侯文字得我驚五嶽縱橫守巖城萬夫之下不孺屈定知名滿四海非
真榮富如春秋已如此他日卜鄰長兒子一丘各自有林泉扶將白頭宴
喜秋風日暮衣裳單深巷落葉已如彈教來會面復能幾六龍去人不可
攀短歌溷公更一和聊乞淮南作小山

廖侯言如不出口銓量古今膽如斗度越崔張與二班古風蕭蕭筆追遠
前日辭家來射策聲名籍甚諸公間華陰白雲鎖千嶂勝日一談誰能賞
君不見曩時子產識然明知音爵爵閉佳城勿以匣中之明月計較糞上
之朝榮我去丘園十年矣種桑可蠶犢生子使年七十今中半安能朝四
暮三浪憂喜據席談經只強顏不安時論取譏彈愛君草木同臭味頗似
瓜葛相依攀我有仙方煮白石何時期君藍田山

次韻答楊子聞見贈

金盤厭飫五侯鯖玉壺澆發郎官清長安市上醉不起左右明粧奪目精
結交賢豪多杜陵桃李成蹊卧落英黃綬今為白下令蒼頭只使故人驚
督郵小吏皆趨版陽春白雪分吞聲楊君青雲貴公子歎嗟簿領困書生
贈我新詩甚高妙淚斑枯笛月邊橫文章不直一杯水老矣忍與時人爭
江城歌舞聊得醉但願數有美酒傾莫要朱金纏縛我陸沈世上貴無名

次韻和答孔毅甫

鵬飛鷗化未即逍遙游龍章鳳姿終作廣陵散滄浦鑪邊督數錢故人陸
沉心可見氣與神兵上斗牛詩如晴雪濯江漢把詠公詩闔且開旁無知
音面墻歎我今廢書迷簿領魚蠹筆鋒蛛網硯六年國子無寸功猶得江
南萬家縣客來欲語誰與同令人熟寐觸屏風竊食仰愧冥冥鴻少年所
期如夢中江頭酒賤樽屢空南山有田歲不逢相思夜半涕無從千金公
亦費屠龍

再用舊韻寄孔毅父

鑿中之髮蒲柳望秋衰眼中之人風雨俱星散往者託體同青山健者漂
零不相見庾公樓上有詩人平生落筆瀉河漢置驛勤來索我詩自說中
郎識元歎我方凍坐酒官曹為公然薪炙冰硯不解窮愁著一書豈有文

章名九縣奴星結柳送文窮退倚北窗睡松風太阿耿耿截歸鴻夜思龍
泉號匣中斗柄垂天霜雨空獨鴈叫群雲萬重何時握手香爐峰不看寒
泉濯卧龍

和張仲謀陳純益

渡江羈宦襄江北紅塵染盡春衫色春畝輟耕草冉冉瘦妻病餘廢組織
官倉得粟何常飽清夜飢腸吟唧唧西風吹夢到故鄉千里關山雲水白
可伶奪却田園樂何異萬金輸一擲亂轍曾無長者車經年不造先生席
張侯少年二陳俊頃蓋能如舊相識涼秋夏日數來過要與六經生羽翼
貧家雖無樽酒懼小徑曾鉅待三益劇談莫問斗闌干坐須山月吐半壁

次韻文潛

武昌赤壁弔周郎寒溪西山尋漫浪忽聞天上故人來呼船凌江不待餉
我瞻高明少吐氣君亦歡喜失微恙年來鬼祟覆三豪詞林根柢頗搖蕩
天生大材竟何用只與千古拜圖像張侯文章殊不病歷險心膽元自壯
汀洲鴻鴈未安集風雪牖戶當塞向有人出手辦茲事政可隱几窮諸妄
經行東坡眠食地拂拭寶墨生楚滄水清石見君所知此是吾家秘密藏

古風次韻答初和甫二首

飢思河鯉與河魴渴思蔗漿玉盃涼冬願純綿對陰雪夏願絢緯度盛陽
萬端作計身愁苦一事不諧髮蒼浪調笑天街吟海燕藜羹脫粟非公狂

贈答晁次膺

次膺豪健如霜鷗空拳誤掛田犬牙果輸司空城旦作付與步兵厨人家
野馬橫郊作疑水牽牛引竹上寒花無酒醉公不甚惜誦公五字使人嗟

次韻和魏主簿

梅蕊觸人意繞枝三四旋玄冥與之笑青帝不爭權簾晚壽陽醉雲深姑
射眠愁蛾英半落嬌靨齒初圓短簿吹卷笛諸郎宴洞天官樓仇覽棘才
拍翰林肩風力能冰酒霜威欲折綿錦衾寒有恨花信遠難傳飲罷鍾催
曉詩成律換年餘香勤管領莫厭屢中賢

答余洪範二首

道在東西祖詩如大小山一家同雪月萬事廢機關天上麒麟閣山中虎
豹閑何時得丘壑明鏡失朱顏

懸罄齋厨數米炊貧中氣味更相思可無昨日黃花酒又是春風柳絮時

次韻答秦少章乞適道贈答詩

二子論文地陰風雪塞廬寧穿東郭履不遺子公書士固難推挽時聞有
詔除負暄真得計獻御恐成疎

次韻高子勉十首

雪盡虛簷滴春從細草迴德人泉下夢俗物眼中埃久立我有待長吟君
不來重玄鎖關籥要待玉匙開

掃雪我三日御風君過旬言詩今有數下筆不無神行布佳期近飛揚子
建親可恨金石友去不待斯人

峴南羈旅井灞上獵歸亭日繞分魚市風回落鴈汀筆由詩客把笛為故
人聽但恐蘇耽鶴歸時或姓丁

君不居郎省還應上諫坡才高殊未識歲晚喜無它櫪馬羸難出鄰雞凍
不歌寒爐餘幾火仄裏撥陰何

荆渚樓中賦南陽嵬底吟誰言小隱處頻屈故人臨經筵難窺底詞源幸
汲深思君眠竹屋雪月冰寒衾

驚人得佳句或以傲王公處世要清節滑稽安足雄深沉侶康樂簡遠到
安豐一點無俗氣相期林下同

志士難推轂將如高子何心期誠不淺餘論或相多欲向滄洲去還能小
艇麼鷓鴣西照處相並曬漁簑

鑿開混沌竅窺見伏羲心有物先天地含生盡陸沈伐山成大厦鼓橐籥
祥金三尺無絃木期君發至音

少年基一簣長歲足三餘忽作飛黃去頓超同隊魚尊前八采句窻下十
年書定作牛腰束傳抄聽小胥

沙上步微暖思君剝故招萋蒿穿雪動楊柳索春饒枉駕時逢出新詩若
見捺樽前遠湖樹來飲莫辭遙

次韻聞善

扶醉三竿日題詩一研埃張羅門帶雪投轄井生苔待得成丘隴誰能把
酒盃常應黃菊畔悵望白衣來

陳榮緒惠示之字韻詩次韻三首

紛紛不可耐君子有憂之鞅掌誠莊語賢勞似怨詩頽波閱砥柱濁水得
摩尼知我無枝葉剝心只有皮

太丘胃量闊一蓐莫杭之萬事不掛眼四愁猶有詩狀閑聊闕茸心潔似
毗尼早晚同舟去煙波學子皮

十家有忠信江夏可無之政若寄賣友忽聞衡說詩飢蒙青糶飯寒贈紫
施尼酬報矜難巧深慙陸與皮

德孺和之字詩韻復和成一笑

且然聊爾耳得也自知之獨笑真成夢狂歌或似詩照灘禽郭索燒野得
伊尼蚤晚同來醉僧窓卧虎皮

次韻古老十首

十襲發剛刀無名自貴高秋衣猶葛製午飯厭溪毛
萬木霜搖落山呈斧鑿痕癡蠅思附尾驚鶴畏乘軒
日短循除廡溪寒出臼科官居圖畫裏小鴨睡枯荷
眼看人換世手種木成陰藏拙無三窟談禪劇七禽
寒水幾痕落秋山萬竅號紅梨啄鳥鵲殘菊掛蠨蛸
佳人斗南北美酒玉東西夢鹿分真鹿無雜應木雞
斲鼻昔常尔絕絃知者稀無人與爭長唯有釣魚磯

茵席絮剪蠶枕囊收决明南風入晝夢起坐是松聲
半菽一瓢飲懸鶉百結衣蕭條鬼木聊可與同歸
學似斲輪扁詩如飯顆山室中餘一劍無氣斗牛間

次韻郭右曹

閱世行將老斲輪那能不朽見仍雲歲中日月又除盡聖處工夫無半分
秋水寒沙魚得計南山濃霧豹成文古心自有著鞭地尺璧分陰未當勤

和答孫不愚見贈

詩比淮南似小山酒名淘米出雲安且憑詩酒勤春事莫愛兒郎作好官
簿領侵尋台相筆風埃蓬勃使星鞍小臣才力堪為掾敢學前人便掛冠

次韻裴仲謀同年

交蓋春風汝水邊客床相對卧僧僮舞陽去葉纔百里賤子與公皆少年
白髮齊生如有種青山好去坐無錢州沙篁竹江南岸輸與鷓鴣取次眠

次韻答李端叔

喜接高談若飲冰風騷清興坐來增重尋伐木君何厚欲賦驪駒我未能
山影北來浮雁澤松行東望際鍾陵相期爛醉西樓月緩帶憑欄濯鬱蒸

和荅王世弼

文章年少氣如虹肯愛閑曹一禿翁
絃上深知流水意鼻端不怯運斤風
燕堂淡薄無歌舞鮭菜清貧只韭葱
慚愧伯鸞留步履好賢應與孟光同

荅李康文

才甫經年斷來往逢君車馬慰秋思
幽蘭被逕聞風早薄霧乘空見月遲
每接雍容端自喜交無早晚在相知
深慙借問談經地敢屈康成入絳幃

荅德甫弟

鳥啼花發獨愁思憐子三章怨慕詩
鴻鴈雙飛彈射下脊令同病急難詩
功名所在猶爭死意氣相須尚不移
何況極天無以報林回投壁負嬰兒

次韻馬荊州

六年絕域夢刀頭判得南還萬事休
誰謂石渠劉校尉來依絳帳馬荊州
霜鬢雪鬢共看鏡茶糝菊英同送秋
它日江梅臘前破還從天際望歸舟

次韻德孺惠秋字

少日才華接貴游老來忠義氣橫秋
未應白髮如霜草不見丹砂似箭頭
顧我今成喪家狗期君早作濟川舟
漢家宗廟英靈在定是寒儒浪自愁

次韻荅任仲微

邂逅相逢講世盟諸任尊行各才名
交情吾子如棠棣酒椀今秋對菊英
高論生風搖麈尾新詩擲地作金聲
文章學問嗟予晚深信前賢畏後生

次韻王定國見寄

清洛思君晝夜流北歸何日片帆收
未生白髮猶堪酒垂上青雲却佐州
飛雪堆盤鱸魚腹明珠論斗煮雞頭
平生行樂自不惡豈有竹西歌吹愁

次韻奉酬劉景文

省中岑寂坐雲牕忽有歸鴻拂建章
珍重多情惟石友琢磨佳句問潛郎
遙憐部曲風沙裏不廢平生翰墨場
想見哦詩煮春茗向人懷抱絕關防

次韻奉荅存道

主簿朝衣如敗荷高懷千尺上松蘿
旅人爭席方歸去秋水黏天不自多
學到會時忘繫可詩留別後見羊何
向來四海習鑿齒今日期君不啻過

次韻奉荅少微紀贈二首

詩來清吹拂衣巾句法詞鋒覺有神
今日相看青眼舊它年肯作白頭新
文如霧豹容窺管氣似靈犀可辟塵
慙愧相期在臺省無心枯木豈能春

文章藻鑿隨時去人物權衡逐勢低
揚子墨池春草遍武侯祠廟曉鷹啼
書帷寂寞知音少幕府留連要路迷
顧我何人敢推挽看君桃李合成蹊

次韻奉荅吉鄰

黠虜乘秋屢合圍上書公獨請偏師
庭中子弟芝蘭秀塞上威名草木知
千里折衝深寄此三衙虛席看除誰
與公相見清班在仁祖重來築舊基

荅和孔常父見寄

孔氏文章冠古今君家兄弟况南金
為官落魄人誰問從騎雍容獨見尋
旅館別時無宿酒郵筒開處得新吟
黃山依舊寒相對豈有愁思附七林

和呂秘丞

北海尊中忘日月南山霧裏晦文章
清朝不上九卿列白髮歸來三徑荒
車轍馬蹄踈市井花光竹影照門墻
人間榮辱無來路萬頃風煙一草堂

辱粹道寄書以長句謝

病癖無堪苦賴書交親情分豈能踈
深慙煙際兩鴻鴈遺我罾中雙鯉魚
故國青山長掛眼今年白髮不勝梳
幾時得計休官去筍葉裹鹽同赴虛

次韻荅任仲微

伯氏文章足起家鴈行唯我乏芳華
不堪黃綬腰銅印只合清江把釣車
縮項魚肥炊稻飯扶頭酒熟卧蘆花
吳兒何敢當倫比或有離騷似景差

次韻荅趙彥成

日轉溪山幾百遭厭聞虎嘯與猿號
笙歌忽把二天酒風雨猶驚三峽濤
已作齊民尋要術安能痛飲讀離騷
看君自是青田質清唳猶堪徹九臯

同子瞻韻和趙伯充

金玉堂中寂寞人仙班時得共朝真
兩宮無事安盤石萬國歸心有老臣
家釀可供開口笑侍兒工作捧心顰
醉鄉乃是安身處付與升平作幸民

次韻荅馬中玉三首

雨入紗窓風簸船菊花過後早梅前
錦江春色薰人醉也到壺中小隱天
卷沙成浪北風顛銜尾千艘不敢前
匝岸水居皆有酒行人得意買江天
仁氣已蒸全楚盡同雲欲合莫江前
爭春梅柳無三月對雪樽罍屬二天

次韻公定世弼贈荅二絕

何用苦吟肝腎愁但知把酒更無憂
聲名本不關人事看取青門一故侯
酒因咀嚼還知味詩就呻吟不要工
王謝風流看看妙病夫直欲卧墻東

次韻徐文將見寄二首

槐催舉子著花黃來食邯鄲道上梁便欲掃牀懸塵尾正愁喘月似燈光
千頭剖蚌明珠熟百尺垂絲繪縷長柳下石門君有此可能衝雪厭清涼

次韻荅杜仲觀二絕

鳥啼花動却春寒雨壓青旗卷畫幃多事今年廢詩酒煩君傳語問平安
重簾複幕和風雨無奈催沽鳥喚人只是樽前欠狂客舞娃冰雪酒磷磷

再次韻杜仲觀二絕

短舞朱裙愜醉看惜公官守隔江干遙憐得句無人賞走馬城東覓道安
詩家二杜見仍雲佳句風流照映人青眼向來同醉醒白頭相望不緇磷

次韻荅邵之才

文章真向古人踈聊有孤懷與世殊陋質不堪華袞贈可能薰以似明珠
奉荅李和甫二絕

山色江聲相與清卷簾待得月華生可憐一曲並船笛說盡故人離別情
夢中往事隨心見醉裏繁華亂眼生長為風流惱人病不如天性總無情

類編增廣黃先生大全文集卷第十八

餞送

次韻奉送公定

去年君渡河棗下實離離今年君渡河剝棗詠幽詩直緣恩義重不憚鞍
馬疲詩書半行李道路費歲時親交歎存亡學問訪闕遺我多後時悔君
亦見事遲即此有真意定非兒女知虛名無用處北斗與南箕燕趙游俠
子長安輕薄兒狂掉三寸舌躡登九級墀覆手雲雨翻立談光陰移軟血
盟父子指天出肝脾從來國器重見謂骨相奇築巖發夢寐獵渭非熊螭
百工改繩墨一世擅文詞全人脰肩肩甕盎媼且宜大槐陰黃庭女蘿綿
絡之昭陽兩兄弟還自妬娥眉工輦又宜笑百輩來茹咨班姬輕鴻毛更
合衆口吹引繩痛排根蒙蔽枉成帷唯恐出已上殺之如弈碁塵埃百年
琴絕絃爲鍾期落落虎豹文義難管中窺至今楊子雲不與俗諧嬉歲晚
草玄經覃思寫天維脫身天祿閣危於劍頭炊卧聞策董賢閉門甘忍饑
五侯盛賓客騶轡交橫馳時通問字人得酒未曾辭近者君家翁天與脫
馬鞵已爲冥冥鴻增嫩尚安施養蘭尋僧圃愛竹到水湄北闕免朝請西
都分保釐文章九鼎重富貴一忝累趙良請灌園但爲商君嗤弃甲尚文
過兕多牛有皮出仕書掣肘歸來菊荒籬不爲五斗折自無三徑資勝箭
洗蹠血歸鞍懸月支斯人萬戶侯造物付鑪錘我觀史臣篇疏略記糟醅
譬如官池蛙誰能問公私君懷明月珠簸弄滄海涯深房珮芳蘭固是王
所姬南貢尚包橘漢濱莫大隨每來促談麈風生庭竹校翫麟得家法伊
優不能爲但聽呼擗捕便足解人頤功成在漏刻穎利處囊錐失勢落坑
穿寒窳如愁鷓得馬折足禍亡羊多歧悲屢敵因心計伏兵幾面欺長戈
仰開來吐歎受羈縻萬事只如此畢竟誰成虧愛君方寸間醇朴乃器師
安得擺俗纏東崗並鉏犁由來在陰鶴不必振羽儀送行傾車蓋載酒滿
鷓夷天高木葉下潦退河流卑屯雲塞六幕新月吐半規人生會面難取
醉聽狂癡語穿發欺笑詩鋒犯嘲譏懸知履霜來少別爲不怡天津媚河
漢闕角掛秋霓中有鬼與神赤舌弄陰機夜光但十襲出懷即瑕疵去去
善逆旅凍醪約重持山藥倒藤架紅梨帶寒曦坐須騎奴還淹留歲恐期
無爲出門念牽衣嬰孺啼短韻願成誦時時寄相思

送彥孚主簿

斯文當兩都江夏世無雙叔度初不言漢庭望風降中間眇人物潛伏老
空硿本朝開典禮樞樞作株椿世父盛文藻如陸海潘江三戰士皆北轍
弓錦韜紅白衣受傳詔短命終螢牕夢升卧南陽耆舊無兩龐空鏡歐陽
銘松風悲隴隴四海群從間爾來頗瑋宗主簿吾宗秀其能任爲邦軀幹
雖眇小勇沉鼎可扛擇師別陳許取友觀昇逢折腰佐髯令邑訟銷吠
時邀府中飲下箔蠟燒缸紅裳笈千金清夜酒百缸同僚有惡少嘲謔語
亂唳君但隱几笑諸老嘆敦龐况乃工朱墨氣和信甚砥持此應時須十
年擁麾幢相逢常鞅掌衙鼓趨擊鼓簿書敗清談汗顏吏樞樞臨分何以
贈要我賦蘭汀黃華雖衆笑白雪不同腔野人甘芹味敢饋厭羊控顧予
百短拙飽腹贛胥肱唯思解官去一丘事耕稼君當取富貴鍾鼓羅擊撞
伏藏魁黠徑猶想足音登

送吳彥歸番陽

學省困齋鹽人材任尊獎倥侗祝螟蛉小大器嬰旒諸生厭晚成躡學要
僧駟摹書說偏旁破義析名象九鼎奏簫韶爰居端不饗青衿少到門庭
除晝閑敞竹風交槐陰三見秋氣爽時賴解事人載酒直心賞吳郎楚國
材幽蘭秀榛莽彥國吐嘉言子將喜標榜平生欽豪俊久客慕鄉黨虛齋
延灑掃薄飯薦膳養詩句唾成珠笑嘲愜肥蚌春夏頻謝除曾未厭來往
歸鴈多喜聲寒蟬停哀響黃花滿籬落白蟻鬧甕盎留君待佳節忽忽戒
沮兩親戚傷離居交游念疇曩碁局無對曹樽蒲失朋長問君去爲何雲
物愁莽蒼壽親髮斑斑千里勞夢想家雞薰頭肥寒魚受罾網甘旨款中
厨伊啞弄文襁此行樂未央安知川塗廣深秋上滄江遠水平如掌人生
要得意壯士多曠蕩野鶴疲籠樊江鷗戀菰蔣本來丘壑姿不著芻豢養
寄聲謝鄉鄰爲我具兩漿有路即歸田君其信非誑

薛樂道會飲作詩餞行

薛侯本貴胄射策一矢中金蘭託平生瓜葛比諸從數面尚成親况乃居
連棟交游及父子講學連伯仲奴人通使令孩稚接戲弄相憐負米勤同
力采蘭供每持君家書平安覩欸縫秦人與吾炙憂樂一體共釋之廷尉
曹微過成繫訟從此張長公不肯爲時用丘阿無梧桐曲直不在鳳生涯
谷口耕世事邯鄲夢自君抱憂端酒椀未忍顛高秋自南歸意氣稍寬縱
黃花尚滿籬白蟻方浮甕私言助燕喜且莫戒輜重霜風獵帷幕銀燭吐

蟬竦密坐幸頗歡劇飲寧辭痛踈鐘鳴曉撞小雨作寒霧旣馬蕭蕭鳴征
人稍稍動九衢槐柳中縱緩青絲鞵朱樓豪士集紅袖清歌送河鯉獻鱸
材江橙解包貢蟹擘鵝子黃酒傾琥珀凍舉觴送酌我發噓知見頌行行
鞭箠倦短句煩屢諷

送晁道夫叔姪

晁氏出西鄂世家多藝文文壯和昂實尚書亦大門簡編自襁褓簪笏到
仍昆向來映軒冕頗據要路津恩勤均骨肉四海一堯民無咎晚相見實
惟諸晁孫智囊似內史筆力窺漆園詞林少根蒂斯人今絕倫我為折腰
吏綠綺網蛛塵傾心得僚友燕及春令原嘉有味同和絃誦聲相聞如人
逃空虛見似已解顏何況金石交迺其骨肉親二年吟楓葉忘我木索勤
行行不忍別共醉古柳根樽前猶講學夏夜眾星繁念當侍白髮甘旨共
蘭蓀帆檣灑風雨浪波出蛟龜持親慎行李強學加飯餐華囊走官郵寄
書遠相存阿四去大農六典與討論君到輦轂下為問平生言儻登鄴王
臺多謝髯參軍

贈別李儀之

行行重行行我有千里適親交愛此別勸我善眠食惟君好懷抱高義動
顏色贈子青琅玕結以永弗諉拭目仰盛德洗心承妙言子道甚易行乃
難忘虛名織女星不能成文章微君好古學尚誰發予狂事親見不足擇
友知無方大聖急先務君其愛頽光外將周物情中不敦已道以客從主
人辨之苦不早行身居言前悟理在意表苟能領斯會大自足諸小勿念
一朝患勿忘終身憂忠誠照屋漏萬物將自水此道不子欺實吾聞之丘
群居行小惠宴筵奉樽俎益友來在門踈拙不見取誰不聞此風去君鴻
鵠舉

送張沙河遊齊魯

張侯去沙河三食鄴下麥筆力望晁董頗遭俗眼白平生學經綸曾中負
奇畫未論功活人飽飯不常得妻寒尚賓敬兒餓猶筆墨側聞共伯城魚
稻頗宜客又持塵生甑欲往立四壁平生貸米家十輩來簿青囊無孔方
兄面有在陳色守株伺投兔歲晚將何獲廣道無人行春風轉沙石栖栖
馬如狗去謁東侯伯布衣未可量蒼髯身八尺魚乾要斗水士困易為德
譬之舉大木人借一臂力諸公感意氣豈待故相識吾窮乏祖錢折柳當

馬策

贈別李端叔

我觀江南山如目不受垢憶食江南薇子獨於我厚在北思江山如懷水
雲顏千峰上雲雨岑絕何由攀當時喜文章各有兒子氣爾來領須白有
兒能拜起讀書浩湖海解意開春冰成山更崇堀顧我醜丘陵白玉著石
中與物太落落涇渭相將流世不名清濁乞言既不易贈言良獨難古來
得道人挂古屋壁間牧羊金華道載酒太玄宅支願聽晤語願君喙三尺
我行風雨夜船牕聞遠鷄故人不可見故人心可知

送陳季常歸洛

人生俱行役何能如聚鹿浮楂在江湖邂逅一相觸天邊數年別故人有
陳叔誰云區區葉車馬肯來辱清樽聽夜語常燧三四燭劇談連古今天
漢瀉崖谷高材歎加壯所向動乖俗我官塵土間強折腰不曲飽飯逐人
行君來方拭目汝穎無奇士僕夫催結束嗟如秋牕暉來少去若速蚤吾
接雍容愛德心不足歲晚託懿親情義迺愈篤落日送河梁鳴蟬度喬木
歲寒贈君何唯有南溪竹

送蒲元禮南歸

元禮佳少年俊氣欲無敵文章詩最豪溟漲助筆力三年葉公城於我固
多益恨無荆鷄材使君有羽翼此行省親闈綵服耀春色從容文字間固
未曠子職蘄春向鄂渚曾不三四驛吾師李武昌金聲而玉德誠能勇一
往所進豈寸尺江南後生秀居多門下客願君從之遊琢磨就圭璧斗酒
清夜闌缺月挂屋壁鷄鳴馬就轡少別安足惜人生共一世誰能無行役

送錢一果卿

錢君佳少年濯濯春月柳開談屢逼人落筆若揮帚鳧拔蒲中英材頗
時有同聲傾風期異性接婚友冷官國北門會面始八九時時過薄飯卯
坐常至酉今日得休沐方醺步兵酒聞子車馬南欲餞輒掣肘温風媚行
色綠淨無塵垢魚軒迎少婦能獻一親壽到家春已融柔條可結紐羨藻
蔓平湖釣船先入手南鴈正北來蚤寄詩千首

送李德素歸舒城

僧夏莫問塗麥秋宜煮餅北寺旬休歸長廊六月冷簟翻寒江浪茶破蒼
壁影李侯為我來遽以歸期請青衿廢詩書白髮違定省荒畦當鋤灌蠹

簡要籤整挽衣不可留決去事幽屏天恢獵德網日饅養賢鼎此士落江湖孰思令人瘦曾中吉祥宅膜外榮辱境婆娑萬物表藏刃避肯蔡人生要當學安燕不徹敬喜來惟深地相待汲修綆

餞子敦同孔經父韻

日永知槐夏雲黃喜麥秋同朝國士集賜沐吏功休祇園冠蓋地清與耳目謀晴雲泛茗椀飛電落文楸一客衆主人醉此顧虎頭虎頭持龍節排河使東流厥田惟上上桑麻十數州計功不汗馬可致萬戶侯

送張天覺

張侯起巴渝翼若垂天鵬歷詆漢諸公霜風拂觚稜去國行萬里淡如雲水僧歸來頭亦白小試不盡能湖海尚豪氣有人議陳登持節三晉邦典刑寄哀矜公家有間日禪窟問香燈因來叙行李斬寄老崖藤

楊叔明作詩見餞次韻別

楊明叔從予學問甚有成當路無知音求為瀘州從事而不能得子蒙恩東歸用鮫龍得雲雨鷓鴣在秋天作十詩見餞因用其韻以別平津善牧豕飲飛能斬蛟終藉一汲黯淮南解兵交楊子有直氣未忍死

草茅引之入漢朝誰爲續弦膠

楊君清渭水自流濁涇中今年貧到骨豪氣似元龍男兒生世間筆端吐

白虹何事與秋螢爭光蒲葦叢

事隨世滔滔心欲自得得楊君爲己學度越流輩百坐捫故衣蝨垢襪春

汗墨睥睨紈袴兒可飲三斗墨

清靜草玄學西京有子雲太尉死宗社大鳥泣其墳寂寞向千載風流被

仍昆富貴何足道聖處要策勳

桑輿金石交既別十日雨子輿裹飯來一笑相告語楊子困簞瓢諸公不

能舉儻可從我歸沙頭駐鳴鷗

山圍少天日狐鬼能作妖睽閃載一車獵人用鳴梟小智窘流俗寒淺不

能超安得萬里沙晴天看射鵰

元之如砥柱大年若霜鷄王楊立本朝與世作郭郭觀公有膽氣自可繼

前作丈夫存遠大曾次要落落

虛心觀萬物險易極變態皮毛剝落盡惟有真實在侍中乃珥貂御史則

冠豸照影或可羞短策釣寒瀨

松柏生澗壑坐閱草木秋金石在波中仰看萬物流抗辭自抗辭伊優自
伊優但觀百歲後傳者非公侯
老作同安守蹇足信所便曾中無水鏡敢當吏部銓恨此虛名在未脫世
糾纏夢作白鷗去江南水如天

送蕉浚明

西瞻岷山兮東望峨眉錦江清且連漪地靈山秀誕豪傑來入中州振羽
儀相如傲萬物子雲窮一經黃金賣賦聘私室白頭大夫不公卿窮閣卜
肆間十步一毫英竟無人識李仲元不可屈致嚴君平四君德音閉黃壤
只今壘頭松栢聲我住葉公城常如井底坐不謂焦夫子聞風肯來過焦
子初見我如蘭生幽林春風為披拂始得香滿襟中懷坦夷眉宇靜外慕
淡薄天機深花開鳥啼晝寂寂酒闌燭明夜沉沉人皆扶牽爛熳醉子更
把書求本心二年與燈火琢子之玉鋪我金焦夫子我以陋邦無人把書
策邂逅逢君得三益胡為弃我忽遠行手捧嘉陽從事檄焦夫子君起為
我舞我其為君歌君方跨馬涉遠道湖外地少山川多霜秋搖落天日遠
西風翻翻水驚波一筵談笑遂相失兩地離愁各奈何焦夫子酒行君定
起此盃須百分少別遂萬里歸尋所種樹應已數千尺試照嘉陽水君髮
猶未白古人不朽事所願更勉力別後相逢豈在言拭目看君進明德

新寨餞南歸客

初更月蝕缺半壁三更北風雪平屋夜寒置酒送歸客長歌燕鴈燈前落
故園無書已十月目極千里雲水隔客方有行乃未已歸且經予江上宅
比隣諸老應相問為道於今不如昔新知翻手覆手間故人江南與江北
有時日高天氣炙背南軒把書策可憐斯人巧言語今已埋沒黃土陌乃
知生前傾意氣不用身後書竹帛往在江南最少年萬事過眼如鳥翼夜
行南山看射虎失脚墜入崖底黑却攀荆棘上平田何曾悔念身可惜辭
家上馬不反顧談笑據鞍似無敵邇來多病足憂虞平地進寸退數尺意
氣索然成老翁所有鬢髮猶未白閑居為婦執新爨宿處野人爭卧席昔
壯今衰殆不如吾恐未必不為福寄聲諸老善自愛客行努力更強食門
前種柳今幾長戒兒勿令打鷄鵝不晚歸來躑躅開為公置酒臨江閣

送張仲謀

竹鷄相一作爭呼泥滑滑夜雨連明溪漲閣門前馬作遠行嘶迺是張侯來

訪別入門下馬未暖席猛如秋鷹一作欲飛掣黃花可浮惜別杯官沽苦
酸不堪設張侯少年氣高秀大華孤峯帶冰雪袖中日月有新詩正與秋
虫同一律吏曹不能弄以事太尉家兒盡英哲窮愁寂寞雙鳧懸唯子可
輸肝膽說遊君宮室如芝蘭於我弟兄比瓜葛相親更覺相去難一作相
歲時挽斷衫袖不忍訣何賜胃熱緬懷君家方盛時迺翁屢把連城節
北使初隨富亳州萬死弗顧探虎穴煌煌忠槩獎王命汝等于今仕朝列
稍聞塞上秋草黃蟾蜍怒臂當車轍將軍西擁十萬師謀士各伸三寸舌
胡不還家讀父書上疏論兵款天闕燕然山石可磨鐫誰能禦子勤勳伐
功業未成且自愛早寄書來慰飢渴

送劉道純

五松山下古銅官邑居褊小水府寬民安蒲魚少罷訟簿領未減一丘槃
曾中崢嶸書萬卷斂弄日月江湖間網人廣衆自神王按劍之眼白相看
老身風波諳世味如食橘柚知甘酸麒麟圖畫偶然耳半枕百年夢邯鄲
平生樽俎宮亭上涉世忘味皆朱顏此時阿翁尚無恙追琢秀句酬江山
堂堂今為蛻蟬去五老偃蹇無往還大梁城中笏拄頰領髮今成雪點斑
青雲何必出公右亨衢在天無由攀椎鼓轉船如病已夢想樓臺落星灣
子政諸兒喜文史阿稱亦聞有筆端丹徒布衣未可量詩書且對藜藿盤
穴中生涯識陰雨木末牖戶知風寒我今四壁戀微祿知公未能長挂冠

送醇父歸蔡

北風飄飄天作惡枯林已無葉可落寒溪濺濺聲迫人歲聿云莫慘不樂
此時陳子迺弃我歸將索綯亟乘屋吾室尚潭潭留君欲晤談掉頭去不
顧明發解征驂君來久相從知我無所堪好學勇如虎讀書青出藍有疑
必考擊無與不窮探愧無洪鍾響十不荅二三慨予方食貧子腹豈屢厭
藜羹稀糝芼寒殖薄醢鹽雖欲苦留君俎豆無加添從來婚友間恩義亦
云兼草枯方兀兀麥秀待漸漸綠髮佳少年回首垂白髯進德失盛時時
寧為人淹經綸自封植豈不如春蠶此行決矣戒童僕歸旁南陔采蘭菊
旅牀夜夜悲蛩螢行色村中異風俗青燈白酒留故人莫愛一醉至曉角

奉送元翁赴禮部試

江南江北木葉黃五湖歸鴈天雨霜繫船滄城秣高馬客丁結束女縫裳
貢書登名徹未央不比長卿薄游梁南山霧豹出文章去取公卿易驅羊

與君初無一日雅傾蓋許子如班楊囚拘官曹少相見忽忽歲晚稼滌場
一盃僚友喜多在謝守不見空澄江澄江如練明橘柚萬峯相倚摩清蒼
莫堂醺醺客被酒艷歌賸醉燭生光椎鼓發船星斗白明日各在天一方
寒鷗滿枝二橋宅樽前顧曲憶周郎鱸魚斫膾羨爲榮恨君不留誰與嘗
殿前春風君射策漢庭諸公必動色故人若問黃初平將作金華牧羊客

別蔣穎叔

金城千里要人豪理君亂絲須孟勞文星合在天東壁清都紫微醉雲璈
荆溪居士傲軒冕曾吞雲夢如秋毫三品衣魚人仰首不見至牛可下刀
秦川渭水森長戟方壺蓬萊冠巨鼇萬釘寶帶瑀絨席獻納論思近赭袍
連營貔虎甚如水開盡西河擁節旄何時出入諸公間淮湖閱船今二毛
鑿渠決策與天合之祈窘束縮怒濤衣食京師看上計陛下文武收英髦
春風淮月動清鑒白拂羽扇隨輕舸下榻見賢傾禮數後車載士回風騷
斷鼻於郢觀魚於濠小夫閱人蓋多矣幾成季咸三見逃

贈送張叔和

張侯温如鄒子律能令陰谷黍生春有齊先君之季女十年擇對無可人
箕帚掃公堂上塵家風孝友故相親廟中時薦南澗蘋兒女衣袴得補紉
兩家俱爲白頭計察公與人意甚真更能束縛老姦手要使鰥寡無嗷呻
但回此光還照已平生倦學皆日新我提養生之四印君家所有更贈君
百戰百勝不如一忍萬言萬當不如一默無可簡擇眼界平不藏秋毫心
地直我肱三折得此醫自覺兩踵生光輝團蒲日靜鳥吟時鑪薰一炷試
觀之

送何君庸上顛石

臘梅開盡欲凋年痛飲千江壁底眠江寒山瘦思親友歸守平生二頃田
西昌萬戶深篁竹楚國無人知白玉欲附絃歌慰寂寥絃斷枯桐誰識曲
樽前顧曲似姓周學問東山綜九流梅花惱人已落盡真成何遜醉揚州
我今領底髭半白背世政欲學春秋此書百年鎖蛛網亦謂歲晚逢何休
荀侯畫謀取垂棘之奇貪賢無處惜大庚嶺頭煙雨中萬峯挿天如劍直
苦寒行李冰繞須野店青旗可試沽只今人才不易得儻逢滌器識相如

酌別世弼

王郎婚友平生期學問文章過吾黨一見懸知白璧奇三年未負青雲賞

蘇秦六印自多金陶朱再相宜藏鐵貧賤相知乃為貴功名所在何須枉
鄴王城下倒清樽子雲書中幕蛛網樽前惜別語萬千門外催發人三兩
自從相見開青眼無處會面如天上傾壺倒榼駐車馬豈但呼燈照嬰旌
平生相從忘歲月手足割裂誠惻惻譬如旁人看疥癩未易能去膚髮痒
但願自思恩愛間勿以眼前劇愁想

送孫承議歸宜春

宜春別駕鄉丈人來假廬陵二千石虛舟無事鷗與遊良賈深藏客爭席
諸公鞭扑立威名公獨愛民如父兄諸公馭吏如東濕公使人人得盡情
人情居官若郵傳假守攝丞尤自便憂念公家眉不開誰能勤民廢寢膳
贈行欲借筆如椽公不肯留鼓催船歸到宜春問春事斑斑笋竿蕨破拳
廖侯為邦用詩禮府中無事多燕喜看公談笑面生春更為鄉園執桃李

送蘇太祝歸石城

蘇侯恃才頗跌宕常欲立談取將相風期家世非一朝於我今為丈人行
偶然把酒葉公城曾懷披盡能謔浪畫燭如椽吐白虹花枝圍坐紅相向
夜如何其不忍起風吹日照離筵上醉中一笑揮萬金眼前快意誠為當

僕夫結束底死催馬翻玉勒嘶歸鞅南驅面有千里塵道遠回首幾惆悵
漢陽津上游女多何日石城蕩兩漿莫倚廬家有莫愁便成翻手裏前賞

次韻子瞻送李家

驥子墮地追風日未試千里誰能識習之實錄葬皇祖斯文如女有正色
今年持橐佐春官遂失此人難塞責雖然一闕有奇耦博懸於投不在德
君看巨浸朝百川此豈有意潢潦前願為霧豹懷文隱莫愛風蟬蛻骨仙

送陳蕭縣

欲留君以陳遵投轄之飲不如送君以陶令無絃之琴酒嫌別後風吹醒
琴為無絃方見心去夏雨餘清夜醉黃鸝不覺報春深花枝柳色競鮮好
迺是前日枯朽林人生用捨四時可壯士憔悴非獨今大夫黃綬領垂素
二十餘年走塵土盈車載書遣兒讀不悔早為文墨誤治聲翕然先向東
古蕭子國今萬戶德性忠純吏不欺閨門孝友民所慕麥隴童兒憐雉乳
冰天窮子兼襦袴惜惜琴意如溫風迺知不必徽絃具明月清河佳可遊
官倉縻我不得去白露為霜水一篙秋香蓮蕩浮輕舫此中亦有無絃意
相憶樽前把蟹螯

送王郎

酌君以蒲城桑落之酒泛君以湘纍秋菊之英贈君以黔川點漆之墨送君以陽關墮淚之聲酒澆胷中之磊隗菊制短世之頽齡墨以傳千古文章之印歌以寫從來兄弟之情江山萬里頭將白骨肉十年眼終青一作青連牀夜語鷄戒曉書囊無底談未了有功翰墨乃如此何恨遠別音書少炊沙作糜終不飽鏤冰文字費工巧要須心地收汗馬孔孟行世日杲杲有弟有弟力持家婦能養姑供珍鮭兒大詩禮女絲一作麻公但讀書煮春茶一作眼花

送少章從蘇公餘杭

東南淮海惟揚州國士無雙秦少游欲攀天關守九虎但有筆力回萬牛文學從橫乃如此故應當家有季子時來誰能力作難鴻鴈行飛入道山斑衣兒啼真自樂從師學道也不惡但使新年勝故年即如常在郎罷前

送石長卿大學秋補

長卿家亦但四壁文君窺之介如石胷中已無少年事骨氣乃有老松格漢文新攬天下圖詔山採玉淵獻珠再三可陳治安策第一莫上登封書

次韻春遊別說道

愁眼看春色城西醉夢中柳分榆莢翠桃上竹梢紅燕濕社翁雨鷺啼花信風別離感貧賤殷子正書空青春倚江閣萬象客愁中江水不勝綠簷花無賴紅欹斜半簾日留滯一帆風攜手離筵上清樽不易空

次韻伯易席上贈行

迎新與送故渠已不勝勤民賣腰間劔公寬柱後文諸郎投賜沐高會惜臨分去國雖千里分憂即近君

老惜交情別追隨車馬勤臨朝思共理治郡復斯文訟息常休吏民貧更勸分西湖十頃月自比漢封君

送楊罐鴈門省親二首

執戟老翁年七十人看生理亦無聊草玄事業窺周易作賦聲名動漢朝今見遠孫勤翰墨還持遺藁困簞瓢三年鄉校趨晨鼓一日邊城聽夜刁野飯盈盤厭葱韭春風半道解狐貂歸時定倒迎門徒問鴈安能學度遼蜀客出衰世獨升鄒魯堂蚊虻觀得失虎豹擅文章吾子已強學草玄宜

不忘江河須畎澮松栢要冰霜馬策路千里風門書數行旨甘君有婦
壁愛分光

和荅元明黔南贈別

萬里相看忘逆旅三聲清淚落離觴朝雲往日攀天夢夜雨何時對榻涼
急雪春令相並影驚風鴻雁不成行歸舟天際常回首從此頻書慰斷腸

宜陽別元明

霜須八十期同老酌我仙人九醞觴明月灣頭松老大永思堂下草荒涼
千林風雨鷺求友萬里雲天鴈斷行別夜不眠聽鼠齧非關春茗攬枯腸

送彭南陽

南陽令尹振華鑣三月春風困柳條攜手河梁愁欲別離魂芳草不勝招
壺觴調笑平民訟賓客風流醉舞腰若見賢如武侯者為言來仕聖明朝

送鄧春思歸長沙

鄧侯過我解新鞵潦倒猶能以舊時西邑初除折腰尉南陔常詠采蘭詩
姓名已入飛龍榜書信新傳喜鵲知何日家庭共一笑綠衣便是老萊衣

送杜子卿歸西淮

雪意泔泔滿面風杜郎馬上若征鴻樽前談笑我方惜天外淮山誰與同
行望村帘沽白蟻醉吟詩句入丹楓一時真賞無人共尚憶江南把釣翁

和荅任仲微贈別

任君洒墨即成詩萬物生愁困品題清似釣船聞夜雨壯如軍墨動秋壑
寒花籬脚飄金鈿新月天涯掛玉篋更欲少留觀落筆須判一飲醉如泥

寄別說道

數行嘉樹紅張錦一派春波綠潑油回望江城見歸鳥亂鳴雙檣散輕鷗
柳條折贈經年別蘆筦吹成落日愁雙鯉寄書難盡信有情江水尚回流

贈別幾復

風驚鹿散豫章城邂逅相逢食楚苹佳友在門忘燕寢故人發藥見平生
只今滿坐且樽酒後夜此堂還月明契闊愁思已知處西山影落莫江清

奉送劉君昆仲

游子歸心日夜流南陔香草可晨羞平原曉半槐夏汾上午風初麥秋
鴻鴈要須翔集早春令無憾急難求欲因行李傳家信姑射山前 晉州

送君庸

北風吹雨薄寒生人與臘梅相照明恨君草草渡江去重約歸時舞鳳笙

次韻子瞻送穆父二絕

渺然今日望人材每見紫芝眉字開又觸惠文江海去快帆誰與挽令回
謫官猶得住蓬萊抱牘人稀書卷開張敞無眉應急召董宣強項莫低回

和仲謀送別二首

夜郎自古流遷客聖出初投第一人不是施州肯回首五溪三峽更誰親
五溪三峽漫經春百病千愁逢故人何處看君歲寒後欲將兒女更論親

次韻楸宗送別二首

一百八般天上路去年明日送流人小詩話別堪垂淚却道情親不得親
別駕柴門閉一春艱難顛沛不忘君何時幽谷回天日教保餘生出瘴雲

類編增廣黃先生大全文集卷第十八

類編增廣黃先生大全文集卷第十九

留別

留王郎 純亮世弼

河外吹沙塵江南水無津骨肉常萬里寄聲何由頻我隨簡書來顧影將
一身留我左右手奉承白頭親小邦王事略蟲鳥聲無人王甥解鞍馬夜
語雞喚晨母慈家人肥女惠男垂紳有因為酒事豚韭及秋春生涯得如
此舊學更光新索去何草草少留慰艱勤百年才一炊六籍經幾秦要知
曾中有不與跡同陳郢人懷妙質聊欲運吾斤

留幾復飲

幾復平生好能來屈馬蹄愈風觀草檄剖膜受金篦藏器時難得忘言物
已齊買書聊教子讓粟不謀妻碧草迷寒夢丹楓落故溪爾時千里恨且
願醉如泥

再留幾復

客與敝鶉衣囊金盡囊裏蹄贏餘多斷轡垢髮不勝篋道德千年事窮通一
理齊晚田猶漑種稗子且歸妻徑欲眠漳浦幾成訪剡溪鄙心須深雪蓮
藕在淤泥

元明留別

枕柳笋白映玉箸椰子酒清宜貝觴市井衣裘半夷夏陰晴朝暮變炎涼
莫推月色共千里不寄江南書一行無賴加聲上雲漢曉來偏繞九回腸

長沙留別

折脚鐺中同淡粥曲腰桑下把離杯知君不是南遷客魘魅無情須早回

招邀

招子高二十二韻兼簡常甫世弼

我行向厭次夏扇日在搖甘瓜未除龍高柳尚鳴蜩駕言聊攝歸飛霜曉
封條負薪泣裘褐公子御狐貂咸月坐晚晚鬢顏颯然凋道德千古事斯
文非一朝往者我不及後生多見超吾黨三三子士林聳孤標小謝抱周
易忘言獨參寥霍郎楚左史二典考舜堯王生風雅學談辯秋江湖洒筆
驚有司小敵謂可驕女知樗蒲局臨閑敗三梟王生數步階屢赴茗椀邀
小謝殊未來我覺百里遙問之憂救水心慮極無聊父隣母不訶日以濁
洒澆此道如鼎寶念子羹未調古來有親養回也樂一瓢不田鴉生笑在

物乃為祇吾言有師承可信如斗杓詩以解子憂亦用當子招

叔誨宿邀湖上之遊以故不果往

芟荷採葦野行田田湖光價當酒十千主人邀客殊未來西風枕簟廢書眠
睡罷書窗翻墨汗龍蛇起陸雲雨濕晚筵紅袖勸傾盃公榮坐遠酌不及
章臺粉色未知秋折與行人鞭紫駟金城手種亦如此今日搖落令人愁
雙飛鴛鴦一朝隻春鋤欲以畏白鷗風標公子誠自多波淨月明如鴉何

和知命招晁道夫叔姪

過我諸公子寂寥非世娛茶須親碾試酒可倩行沽日永烏皮几窳寒竹
火爐不來尋翰墨僮僕解獻獻

再次韻戲贈道夫

名教有樂地思君相與娛囊錐見穎疾龍奎待時沽雨歇鳴鳩樹童銷睡
鴨爐不來應夢起弄子學獻獻

李大夫招飲

欲遣吟人對好山莫天和雨醉憑欄座中雲氣侵人濕砌下泉聲逼酒寒
紅燭圍棋生死急清風揮麈笑談閑更籌報盡不成起車從厭厭夜已闌

次韻漢公招七兄

白髮霏霏雪點斑朱櫻忽忽烏銜殘公庭休吏進湯餅語燕無人窺井欄
詩句多傳知有暇道人相見不應難老郎親屈延處士風味依稀如姓柏
和冲和處士劉
麟之鄭案甚厚

和張沙河招飲

張侯耕稼不逢年過午未炊兒女煎腹裏雖盈五車讀囊中能幾錢穿
况聞緼素尚黃葛可怕雪花鋪白氈誰料丹徒布衣得今朝忽有酒如川

迎醇甫夫婦

陳甥歸約柳青初一作飲麥隴纖纖忽可鉏望子從來非一日因人略不
寄雙魚園中鳥語勸沽酒一作日長宜讀書策馬得行休更一作遠蕭威觀髮
白已令僮稚割生芻一作平安行

戲招飲客解醒

破卵扶頭把一杯燈前風味喚仍回高陽社裏如相訪不用閑携惡客來
不飲者為惡客
見元次山集

戲答李子真河上見招來詩頗誇河上風物聊以當嘲云

渾渾舊水无新意漫漫黃塵泥白鷗安得江湖忽當眼臥聽禽語信舩流

招吉老子範觀梅花

播糠眯眼丞良苦鳴鼓連村尉始歸及取江梅來一醉明朝花作玉塵飛

謁訪

次韻徐仲車喜董元達訪之作南郭篇四韻

董侯從軍來意望名不朽款門拜徐公在德不在酒徐公雖避俗對客輒
粲然耳不聞世事時誦陶令篇

和王觀復洪駒父謁陳无已長句

陳君今古焉不學清消無心映涇濁漢官舊儀重九鼎集賢李士見一角
王侯文采以於菟洪甥人閒汗血駒相將問道城門隅无屋止借舩官居
有書万卷繞四壁推蘇不異談至主人自是文章伯鄰里頗惟有此客
食貧各仕天一方佳人可思不可忘河從天來砥柱立愛莫助之涕淋浪

同山甫謁新市趙家

聞君足穀多水牛故來奉干三五頭若得牛時謝牛去不得牛時不謝牛
次韻外舅謝師厚喜王正仲奉詔相南兵回至襄陽捨驛馬就舟

見過三首

漢上思見龐德公別來悲歎事无窮聲名籍甚漫前日須鬢素然成老翁
家釀已隨刻漏下園花更發三四紅相逢不飲未為得聽取百鳥啼忽忽
能來問疾好音傳蹇步且花當日痊身鯉得書增目力呼兒扶立候門前
游談取重慙犀首居物多羸昧計然惟有交親等金石白頭忘義復忘年
語言少味无阿堵冰雪相看有此君燈火詩書如夢寐麒麟圖畫屬浮雲
平章息女能為婦歡喜兒曹解綴文憂樂同科惟石友別離空復數朝暉
閏月訪同年李夷伯子真於河上子真以詩謝次韻

十月不見猶如此未賁斯人歎滯留白壁明珠冬按劍濁涇清渭要同流
日晴花色自深淺風軟鳥聲相應酬談笑一樽非俗物對公無地可言愁

雨過至城西蘇家

飄然一雨洒青春九陌淨無車馬塵漸散紫煙籠帝關稍回晴日麗天津
花飛衣袖紅香濕柳拂鞍韉綠色勻管領風光唯痛飲都城誰是得閑人

趙令許載酒見過

玉馬何時破紫苔南溪水滿綠徘徊買魚斫鱠須論網撲杏供盤不數枚

廣漢威名知訟少平原樽俎費詩催
草之寂寂下簾幙相得閑時公合來

和荅趙令同前韻

人生政自無閑暇忙裏偷閑得幾回
紫燕黃鸝驅日月朱櫻紅杏落條枝
詩成稍覺嘉賓集欲少先愁急板催
親遣小童鋤草徑鳴騶早晚出城來

趙令荅詩約携山妓見訪

晴波鷓鴣漾潭隈能使遊人判不回
風入園林寒漠漠日移宮殿影枚枚
未嘗綠蟻何妨撥宿戒紅粧莫待催
缺月西南光景少仍須挽取燭籠來

駐輿遣人尋訪後山陳德方家

江雨濛濛作小寒雪飄五老鬢毛斑
城中咫尺雲橫棧獨立前山望後山
入窮巷謁李村叟翹雙戲贈兼簡田子平三首

紫冠黃鈿網絲窠蝶繞蜂圍柰晚何
二叟家居如避世開門自少俗人過

紫冠黃鈿黃菊

只可關中安止止誰能鐵裏闢錚錚
田多穀少無人會匹似無田過一生
田郎把菊荒三徑文字時追二叟遊
万卷藏書多未見老夫端擬乞荊州

戲謔

戲贈陳季張

氣清語不九郭洎陳季優季子有美質
明月懸高秋詞談貫百家炙轂出膏油
放聲寄大塊肆情無去留方圓付自尔
規矩為瘡疣當其說荒唐眾口莫能咻
書案鼠篆塵銜蔬蒲床頭居不貴家舍
那聞大馬牛吾嘗觀聖人與世為敵酬
道通衆人行智欲萬物周微言觀季子
頗亦有意不季子捧腹笑吾豈措紳囚
我將乘扶搖南與大鵬遊相羊九萬里
厭則下滄洲黃子失所荅如耕不能獲
井蛙延海鱉樂事善一丘束牲盟伯夷
固自取揶揄暗無心以觸物愛子如虛舟
維楫苟不存傾覆當誰尤尚思濟來者
非但自為謀

戲贈諸友 時詔下

驚駘無長途一月始千里驂駟嘶清風
祇在一日耳詩書發書史諸友勿自疑
寧為駘駘懶當效驂駟嘶疏水必有源
析薪必有理不須明小辨取貴論大體
生死命有制富貴天取裁儻能領真意
何有於我哉討論銷白日聖知在黃卷
自此宜數來作詩情續卷

戲呈田子平 六言

甚割即非茸割肥羊自是肥羊老夫纔堪一筋諸生贊詠甘香却歎佳人
纖手晚來應發紅粧荆州衣冠十戶厚音獨有田郎

戲贈高述六言

江湖心計不淺翰墨風流有餘相期乃千載事要須讀五車書

戲贈彦深

李原字彦深厚之弟居南陽

李驢家徒立四壁未嘗一飯能留客春寒茅屋交相風倚墻捫虱讀書策
老妻甘貧能養姑寧剪髮驢不與書大兒得狼不索魚小兒得棍不索襦
庾郎鮭菜二十七太常齋日三百餘上丁分牖一飽飯藏神夢許羊贖蔬
世傳寒士有食籍一生當飯百瓊殖真主張審如此附郭小圃且勤鋤
蒸秋青青葵甲綠早韭晚菘羹糝熟充虛解戰賴湯餅毛以萍齋與甘菊
幾日隣愧已著花一心呪第莫成竹群兒笑驢窮百巧我謂勝人飯重肉
群兒笑驢不若人我獨愛驢無事貧君不見猛虎即人厭麋鹿人還寢皮
食其肉濡需終與豕俱焦飲肥擇甘果非福蟲蟻無知不足驚橫目之民
万物盡請食能踏楚千乘立死山壁漢公獨李驢作人有佳處李驢作詩
有佳句雖無厚祿故人書門外猶多長者車我讀楊雄逐貧賦斯人用意
未全疎

戲答趙伯充勸莫學書及為席子澤解嘲

平生飲酒不盡味五鼎餽肉如嚼蠟我醉欲眠便遣客三年窺牖亦面壁
空餘小來翰墨場松煙兔穎傍明窗偶隨兒戲洒墨汁衆人許在崔杜行
晚學長沙小三昧幻出萬物真成狂龍蛇起陸雷破柱自喜奇觀繞繡牀
家人罵笑寧有道汚染黃素敗粉牆誠不如南鄰席明府蛛網鎖硯蠅書
梁懷中探九起九死才術頗似漢太倉感君詩句喚夢覺邯鄲初未孰黃
梁身如朝露無牢強玩此白駒過隙光從此永明書百卷自公退食一爐香

戲答陳元興

平生所聞陳汀州蝗不入境年屢豐東門拜書始識面鬢髮未成老翁
官瘿同盤厭膾臘茶甌破睡秋堂空自言不復蛾眉夢枯淡頗與小人同
但憂迎笑花枝紅夜窻冷雨打斜風秋衣沉水換薰籠銀屏宛轉復死轉
意根難拔如薙奪

再答元興

君不能入身帝城結子公又不能擊強有如諸葛豐法富樵悴百寶底五

十天涯一秃翁問君何自今為郎便殿奏賦聲摩空偶然樽酒相勞苦牛
鐸調與黃鍾同安得朱轡各憑能江南樓閣白蘋風勸歸啼鳥曉窸籠芳
兒邂逅功補衮鳥倦歸巢葉歸本

戲贈潘供奉

潘郎小時白如玉上學覓歸如仕鷓當年屢過乃翁家沽酒煮鱗不論錢
大梁相逢初不識黃塵漬面催挽船不如去作萬騎將黑頭自致青雲上

戲贈王晦之

故人迹在封豨居折腰從事意何如月明曾聽吹笙否我亦未見緱山鳧
樓苴世上風波惡情知不似田園樂未知嵩山禪老之一言何似黃石仙
翁之三略

戲贈家安國

家侯口吃善著書常願執戈王前驅朱紱蹉跎晚監郡吟弄風月思天衢
二蘇平生親且舊少年筆硯老枯酒但使一公轉鴻鈞此老嬰鏢還冠軍

戲呈孔毅父

管城子無食肉相孔方兄有絕交書文章功用不濟世何異絲窠綴露珠
校書著作頻詔除猶能上車問何如勿憶僧房同野飯夢隨秋鴈到東湖

戲荅仇夢得承制

仇侯能騎矍鑠馬席上亦賦競病詩玄冬未雷蒼蛇卧玉山无年天馬畿
三年荷戈對搖落十倍乞弟亦可縛何如万騎出河西捕取弄兵黃口兒

戲和荅禽語

南村北村雨二犁新婦餉姑翁哺兒田中啼鳥自四時催人脫袴着新衣
着新袴崔嵬不惡去年租重無袴著

戲呈聞善

堆豨病鶴怯雞群見酒特地生精神坐中索起時被肘亦任傍人嫌我真
戲簡朱公武劉邦直田子平五首

戲簡朱公武

不趨吏部曹中版且鱸高沙湖裏魚雖無季子六國印要讀田邱万卷書
歡伯可解藜藿嘲孔方定非金石交君看劉郎最多智昨者火事幾焚巢
劉郎好詩又能文方我奔竄義甚敦為親未葬走人門閉門却掃不足論
朱家墳麓好兄弟陋巷六經葵菑秋我卜荊州三畝宅讀田家書從之游
朱公趨朝瘦至骨歸來豪健踞胡床自看省曹闈者面何如田家侍兒粧

戲荅王定國題門兩絕句

非彼三五少年日把酒償春頰生紅白鷗入群頗相委不謂驚起來賓鴻
頗知歌舞無竅擊我心塊然如帝江花裏雄蜂雌蚊蝶同時本自不作雙

戲贈南安倅柳朝散

柳侯風味晚相見衣袂頗薰荀令香桃李能言妙歌舞樽前一曲斷人腸
洞庭歸客有佳句更領梅花如小棠乘興高帆少相待誰湖秋月要傳觴

戲荅仇夢得承制二首

結髮從征聽鼓鼙未曾一展曾中奇彎弓如月落霜鴈誰道將軍能賦詩
橫槊不爲萬騎先傅林把筆過年年懷中黃石閑三略道上青旗漫百篇

戲荅史應之三首

先生早擅屠龍學袖有新硎不試刀歲晚亦無雞可割庖蛙煎鱖薦松醪
老萊有婦懷高義不厭夫家首宿盤收得千金不龜藥短裙漂紉莫江寒
既有輕塵全有魚漢庭日日召嚴徐不嫌藜藿來同飯更展芭蕉看李書

謝雁之

昨夜風雷震海隅天心急擬活焦枯去年席上蛟龍語未委先生記得無

戲荅龍泉余尉問禪二小詩

重簾複幕鎖娥眉銀燭金荷醉舞衣長爲杖頭欠卣酒不閑禪病減腰圍
翻頭作尾掉枯藤臘月花開更造冰何似清歌倚桃李一爐沉水醉紅燈

揚州戲題

春風十里珠簾捲髻髻三生杜牧之紅藥梢頭初繭栗揚州風物鬢成絲
往歲在廣陵值早春嘗作詩今春有自淮南來者道揚州事戲以

前韻寄王定國二首

淮南二十四橋月馬上時時夢見之想得揚州醉年少正圍紅袖寫烏絲
日邊置論誠深矣聖處時中乃得之莫作秋蟲促機杼貧家能有幾鉤絲

戲贈米元章二首

万里風帆水著天麝煤鼠尾過年年滄江靜夜虹貫月定是米家書畫船
我有元暉古印章印心不刃與諸郎虎兒刀筆能扛鼎教字元暉繼阿章

戲呈閻善一兄

匏懸籬落鷓鴣窺井草上堦除雪衣風想得尊前歌醉帽渾家兒女笑山公

戲荅劉文學知命

人鮪寒中危萬死鬼門關外更千岑問君底事向前去要試平生鐵石心

戲贈元翁

從來五字弄珠璣忍有僧床鎖翠微傳語風流三語掾何時終我百家衣

遊覽

同亮民游靈源廟廖獻臣置酒用馬陵二字賦詩

靈源廟前木我昔見拱把七年身屢到鬱鬱陰翳虜春風獨首馬銜並轡客
簫酒更願少尹賢置酒意傾寫承堂有佳樹花柳輕姪姪連塘想舊葉稻
畦識枯首開樊撫洪河黃流極天馮憶昔武皇來擊壁沉白馬從官親土
石襁負至鰥寡空餘匏子詩哀怨逼騷雅白圭自聖禹今誰定真假臯子
發譴言聖功諒難亞排河著地中勢必千里下移民就寬閑何地不耕稼
此論似太高吾亦茫取全有器可深川吾未之學也馬字

洪河壯觀游太府佳友朋春色挽我出東風如引繩昏昏版築氣王事始
繁興大堤如連山小堤如岡陵增卑更培薄方杵何登登憶昨何失道平
原魚可魯田萊人未復窘大國方徵忽念耒耜閑為民保丘墜百縣伐斲
出夜半廢曲眈吾儕愧祿廩游衍事鞍乘臯子漢公孫新去司馬丞出幹
大農部才術見嗟稱我坐廣文舍七年讀書燈結髮入場屋肯謂河難憑
近來觸事短癡甚霜前蠅吐味極淡薄不了人愛憎唯得一卮酒尚能別
涓涓所以對樽俎未曾問斗升酌我良已多狂言恐侵陵暮雲吞落日歸
鳥求其朋前韻用冷官僕馬瘦及門鼓騰騰陵字

次韻周法甫自青原山寺

市聲故在耳一原謝塵埃乳竇鐘磬翠峰麗昭回俯看行磨蟻重馬度
城隈水猶曹溪味山自思公開浮圖踣金碧廣廈構環材蟬蛻三百年至
今猿鳥哀祖印平如水有句非險崖心花照十方初不落梯堦我行曠託
宿夜兩滴華榱殘僧四五輩法筵歎塵埋石頭麟一角道價直九垓廬陵
米貴賤傳與後人猜曉躋上方土秋勝亂其夢寒藤上老木龍蛇委筋骸
魯公大字石筆勢欲崩摧德人曩來游頗有嘉客陪憶當擁旌旗千騎相
排隊且復歌舞隨絲竹寫煩哇事如飛鴻去名與南斗偕松風吟高丘何
時更能來回首翠微合于役王事催猿鶴一日雅重來尚徘徊碑本按兩

鈎云連子委前
鈎葵花反金句

次韻張仲謀過醴也寺齋

十年醉錦幄，醉醒照金沙。歌眠春風底，不去留君家。是時應門兒，紫蘭茁其牙。只今將弟姝，嬉戲挽羊車。忽書滿窗紙，整整復斜斜。平生悲歡事，頭緒如亂麻。苟祿無補報，幾成來食嗟。喜君崇名節，青雲自有涯。我夢江湖去，釣船刺蘆花。江濱開園宅，畦蔗蒔梨柎。愛驚如昨日，炊玉困京華。公來或藜藿，美愛我不疵。取深念煩鄰里，忍窮甚貧賒。夜談簾幕冷，霜月動金蛇。即是桃李月，春蟲語交加。我亦無酒飲，一室可盤蝸。要公共文字，朱墨勤外差。非復年少日，聲名取燁燁。諸阮有二妙，能詩定自嘉。何時來煮餅，蟹眼試官茶。

次韻文潛同遊王舍人園

移竹淇園下，買花洛水陽。風煙二十年，花竹可迷藏。九衢流車馬，相值各匆忙。豈有道邊宅，靜居如寶坊。幅巾延客酒，妙歌小紅裳。主人有班綴，衣拂御爐香。常恐鳩鵲鳴，百草為不芳。故作龜曳尾，頰深漆園方。初開蝸牛窟，中置師子床。買田死丘間，江漢起臨觴。今此百畝宮，冬溫夏清涼。身閑閱世故，字靜發天光。安肯聲利場，牽黃臂老蒼。張侯筆瑞世，三秀麗齊房。作詩盛推賞，明珠計斛量。掃花坐晚吹，妙語益難忘。重游樊素病，捧心不能粧。來日猶可追，聽我歌楚狂。

溪上吟 并序 時年十七

春山鳥啼新，雨霽汀草怒。長竹篠交陰，黃子觀漁於塘下。尋春于小桃源，從以溪童稚子畦。下三四輩茶鼎酒瓢，淵明詩編雖不命，戒未嘗不取。諸左右臨滄波，拂白石詠淵明詩數篇，清風為我吹衣，好鳥為我勸飲。當其謬然无所拘係，而依依規矩準繩之間，自有佳趣。乃知白蓮社中人，不達淵明詩意者多矣。過酒肆則飲亦無量也。然未始甚醉，蓋其所寓與畢卓劉伶輩同，而自謂所得與二子異人，亦殊不能知之也。酒酣得紙書之，為溪上吟。

短生無長期，聊暇日婆娑。出門望高丘，拱木漫春蘿。試為省鬼錄，不飲死者多。安能如南山，千歲保不磨。在世崇名節，飄如赴燭蛾。及汝知悔時，萬事蓬一窠。青陵陂麥，妍暖亦已花。長煙淡平川，輕風不為波。無人按律呂，好鳥自和歌。杖藜田中歸，牛羊在坡坳。本自无廊廟，政尔樂淵阿。念昔場子雲，刻意師孟軻。狂夫移九鼎，深巷考四科。亦有好事人，時能載酒過。無疑舉爾酒，定知我為何。

三月辛丑同徐靖國到愚溪過羅氏脩竹園入朝陽洞蔣彦回陶
介石僧崇廣及余子相步及余於朝陽岩裴回水濱久之有白雲
出洞中散漫洞口咫尺欲不相見介石請作五字記之

意行到愚溪竹圃鳴檐肩冉溪昔居人埋沒不知年偶託文字工遂以愚
溪傳柳侯不可見古木蔭殿羅氏家瀟東瀟西讀書園笋筍不避道檀
欒搖春煙下入朝陽岩次山有銘鐫石破篆文不辨瞿李表欺密巖壘
磬洞中出寒泉同遊四五客拂石弄潺湲俄頃生白雲似欲駕我仙五將
從此逝挽牽遂回舫

春游

終日桃李踐春風不相識同來二三子承我作意力把酒忘味著看花了
香寂晴雲散長空曠蕩無限闊身為胡蝶夢本自不洩色春蟲勸人歸今
我誠是客歸來翻故紙書尾見麟獲文字非我名聊取二三策

同蘇子平李德叟登擢秀閣

築屋院公城木末置曲欄歲晚對煙景人家橘柚間獨秀司命峯衆丘讓
高寒松竹三橋宅雪雲三祖山衰懷造勝境轉覺落筆難蘇李工五字
篇豈不當慳

次韻吉老遊青原將歸

欣欣林阜樂賞心天際翔清樽鱸鮓鯉朱果實圓方醉罷聽疎雨衾寒夢
國香兩餘山吐月的皦滿簾霜展轉復展轉鍾魚曉瑯瑯思歸笑迎門兒
女扶將相

次韻吉老知命同遊青原

洗鉢尋心去論詩匡鼎來鷓鴣窺錫麩井魚泳釣時臺垂足收親子存身且
劫灰僧雞手金鑰一為首人開
至人來有會吾道本無家閱世魚行水遺書鳥印沙齋盂香佛飯法席兩
天花時有清談勝還同歎永嘉

三月壬申同堯民希孝觀淨名寺經藏得弘明集中沈炯同庾肩

吾諸人遊明慶寺詩次韻奉呈二公

鷓鴣山無酒然松夜有香幸得同高勝於此登心王

祕藏開新譯天花雨舊管證經多寶塔寢疾淨名床鳥詒雜歌頌蛛絲礙
篆香同游得晁李談笑過何王案一作疑

次韻公定世弼登北都東樓

日著闌干角風吹濯漉衣喜同王季哲更得謝玄暉清興俱不淺長吟無用歸月明南北道猶見驛塵飛

眞皇多廟勝仁祖用功深卜宅遷九鼎破胡藏方金百年休戰士當日縱前禽欲斷匈奴臂不如留此心

都城礙飛鳥軍幕目豺豨紫甚疑蠹老黃雲見交秋接天雙闕起伏地九河流耆老深望幸變輿不好遊

漢皇勤遠略晚節相千秋不足中原地猶思一戰收聖朝方北顧斜日倚東樓廟筭知無敵寒儒浪自愁

和荅劉太博携家遊廬山見寄

緩轡松陰不起塵嵐光經雨一番新遙知數夜尋山宿便是全家避世人落日已迷煙際路飛花遠報洞中春可憐不更尋源入若見劉郎想見秦

予既不得葉遂過洛濱醉遊累日

癯民見我亦悠悠癯木巢巢滿道周飛鳥已隨王令化眞龍寧爲葉公留未能先耳箕山去且復吹笙洛浦遊舍故趨新歸有分令人何處欲藏舟

同孫不愚過昆陽

田園恰恰值春忙驅馬悠悠昆水陽古廟藤蘿穿戶牖斷碑風雨碎文章

今昆陽有水俗号昆河圖經乃以爲穰河子考之皆不然
王在昆陽城南是昆水地理志在昆水出南僅是子

和荅荅封王晦之登樓見寄

縣樓三十六峯寒主絮登臨獨倚欄清坐一番春雨歇相思千里夕陽殘詩來嗟我不同醉別後喜君能自寬舉目盡好人作樂幾時歸得釣鯢相

次韻郭明叔登縣樓

令尹登臨多暇日杖生芝菌筆生埃溪橫鳳尾寒光去山擁旌陽翠氣來晚市張燈照遠近笙歌留客舞徘徊紅裳朱履知多在點檢唯無薛秀才

次韻王斌老晚遊池亭

路入東園無俗駕忽逢佳士喜同遊綠荷茵茵稍覺晚黃菊拒霜殊未秋客位正須懸榻下主人自愛小塘幽老夫多病蠻江上願憶平生馬少游

客位一作客位至

岑寂東園可散愁膠膠擾擾夢神遊万竿苦竹旌旗卷一部鳴蛙鼓吹秋

雨後月前天欲冷身閑心遠地常幽杜門謝客恐生謗且作人間鵬鷃游

次韻宋楸宗三月十四日到西池都人盛觀翰林公出遨

金鉞擊烏曉然為邊不比春江水上舩人語車聲喧法曲花光樓影倒晴天
人間化鶴三千歲海上看羊十九年還作遨頭驚俗眼風流文物屬蘇仙

盛和金弟舩場探春二首

雨餘禽語催天曉月上梨花放夜闌莫聽遊人待妍暖十分傾酒對春寒
百舌解啼泥滑滑忽成風雨落花天城南一段春如錦喚取詩人到酒邊

雨中登岳陽樓望君山二首

投荒萬死鬢毛斑生入瞿塘灩澦關未到江南先一笑岳陽樓上對君山
滿川風雨獨憑闌結湘娥十二鬟可惜不當湖水面銀山堆裏看青山

審子興追和予登岳陽樓詩復次韻二首

去年新霽獨憑闌山似樊姬擁鬢鬟雲笥裏茫然多事在世間遙望但雲山
軒皇樂罷拱清斑天地為家不閉關惟有金爐紫煙起至今留作御前山

同劉景文遊郭氏西園因留宿

人居城市虛華館秋入園林著晚花落日臨池見科斗必知清夜有鳴蛙



